

# Ohmächtigi Brieder



1950 - 2019



## Bass uff was d Saisch!

Wenn mir Waggis zämme hogge,  
Isch d Beizeluft halt sauschnäll drogge.  
Bisch s Intrigiere am Studiere,  
Denn reklamiere glyy au d Niere.  
Doch kain am Tisch het en Idee:  
Wie bstellsch korräggt e Hopfeteetee?  
Bedienig, Frailain, heee, Annet  
Gehn nid (Au Saalteff me nid riefte sett).

Denn: Wär hit nyt Falsches riefte will,  
Dä haltet halt sy Schnabel still.  
Und unsre neggschte Cliquehogg,  
Verleege mir ins Trockedogg.

Ain kunnt, wo mir so durschtig sitze,  
Dä wurd bim FCB am Fliigel flitze.  
Waisch, dä, wo stark, wie nenn y s numme,  
Pigmänt schwirrt mir im Hirni umme.  
Wär är e Stigg bim Beschlé duss,  
Denn wär är, glaub, e Schoggokuss.  
Ain wisti s Wort, doch är bewahrt s.  
Wird är s saage, gsächt y schwarz.

Denn: Wär hit bim Wort dernäbe länggt,  
Isch schnäller muultot, als är dänggt.  
Und findsch das Wort doch no, wo passt.  
Hänn d Basler lengscht dr Trainer gchasst.

Bezeichnisch d Moslem Islamische,  
Versehentlich, denn kunsch in d Kische.  
Nennsch d Italiäner, friener d Tschingge,  
Spaghettidriller, denn klopf d Fingge.  
Und Freschlifrässer fir d Franzoose?  
Nid «comme il faut», das goot in d Hoose.  
Bi Zircher losch dr Spott und d Grittig  
Die laite s Schutte do - und d Zyttig.

Denn: Willsch nid, blatsch, im Fettnapf lande,  
So schwygg –wie d päbschtlig Ministrande.  
Und d Zircher wärde immer gränggt,  
Will Zircher jo als Schimpfwort länggt.

Darfsch Schwuule hit no Schwuli saage?  
Gumpt är dir denn an d Wesch und Kraage?  
Saisch besser Homo, Lesbe Homa?  
Denn stirzt dy Oma grad ins Koma  
Mir Waggis traage Gmies und Kraage,  
Darfsch so im Buur vom Elsass saage?  
„Ein Deutsch-Franzose“ wär doch kotzig.  
He, blyyb e Waggis, stolz und trotzig.

Denn: Willsch dr Zunge nid verbroote,  
Denn schwätz so, wie s dir d Wächter roote.  
Im Sauschwob saisch nur Schwoob, das längt,  
Sunscht fühlt sich d Sau am Änd no ggränggt.

Drumm kauf dir nie e Juudefurz,  
E Zwuggel isch nid klyy, nur kurz.  
Guet gnährt und vollschlank nennsch die Digge,  
Bim Namme nenne? Nai, sait Knigge.  
Und gaffsch uf s Balthus-Bild e Stund,  
Denn loob statt s Wyyb dr Hintergrund.  
D Wort gwählt, und s Heesli vo dr Geere  
Das sell das Gschwurbel joo nid steere.

Wie gsait: Wär nyt Falsches saage will,  
Dä haltet halt sy Schnabel still.  
Korräggt trifft me die meischte Gmieter,  
Wenn d saisch, är seig e Baselbieter.  
Denn wenn d im Gaischt Idee traisch,  
Denn überlaisch zerscht, waisch, was saisch.

---

## S goldige Röppli

Stimm fyr uns:  
Schigg e SMS (0.30/SMS) mit „Waage 064“ an  
d Zielnummere 9234  
oder unter [www.goldigs-raeppli.ch](http://www.goldigs-raeppli.ch)

---

D Ladäärne-Uusstellig uff em Minschterplatz und  
d Waage- und Reggwisyte-Uusstellig bi dr Kasäärne  
sin vom Määntig znacht bis am Mittwuch demoorge!  
Deert und an de 3 Verkaufsständ (CINS) in dr Stadt ka  
men au alli Zeedel und Schnitzelbängg, d Blaggedde  
und dr Rädäbäng kaufe.

---

Amerbach'sche Druckerei, Muttenz